



**UDRUŽENJE GRAĐANA ZA POVRAT STARE
DEVIZNE ŠTEDNJE U BiH i DIJASPORI**

RAIFFEISEN BANKA
ž.r. 1610450036820073
e-mail: nnisic@spinter.net
www.starastednjabh.org

Sjedište: Banja Luka 78000
I. G. Kovačića 139b
tel. 051/380-738
fax. 051/381-374

UPRAVNI ODBOR

Broj: 1459/09

Banja Luka, 19.01.2009.

SAVJET MINISTARA BOSNE I HERCEGOVINE

Predsjedavajućem gospodinu Dr Nikoli Špiriću

71000 Sarajevo Trg BiH 1. fax.+387 33 211 464

e mail: gzivkovic@vijecceministara.gov.ba

VLADA REPUBLIKE SRBIJE

Predsjedniku Dr Mirku Cvetkoviću

11000 Beograd Nemanjina 11. fax. +381 11 3617 609

e mail predsjednikvladesrbije@srbija.sr.gov.yu

VLADA REPUBLIKE SLOVENIJE

Predsjedniku Borutu Pahoru

1000 Ljubljana Gregorčičeva 20, 25 fax. +386 1 478 1721

e amil gp.kpv@gov.si

PREDMET: Sporazum o sukcesiji i pitanje stare devizne štednje

Poštovana gospodo,

Obraćam Vam se u ime Udruženja građana za povrat stare devizne štednje u Bosni i Hercegovini i dijaspori. Udruženje građana za povrat stare devizne štednje u BiH i dijaspori osnovano radi zastupanja interese svojih članova kao i svih građana Bosne i Hercegovine koji su svoj novac, oko milijardu i pol evra, prije ratnih dešavanja položili na štednju u neku od banaka koje su poslovale na prostoru Bosne i Hercegovine sa jednim jedinim ciljem: isplata stare devizne štednje građanima BiH u što kraćem roku nezavisno od toga u kojoj su banci ostavili svoje devize i gdje sada žive.

Udruženje građana za povrat stare devizne štednje u BiH i dijaspori ima najveći broj članova od svih udruženja u Bosni i Hercegovini. Radi se o istinski multietničkom udruženju sa više desetina hiljada članova, građana Bosne i Hercegovine, pripadnika svih konstitutivnih naroda i nacionalnih manjina. Udruženje djeluje putem svojih kancelarija, ureda – podružnica na teritoriji cijele Bosne i Hercegovine, a ima za potrebe dijaspore predstavništva i u inostranstvu (Njemačka, Srbija, Austrija, Francuska, Švajcarska, Švedska). Udruženje je upisano u Registar udruženja koji se vodi kod Ministarstva pravde Bosne i Hercegovine od 2004. godine.

U Udruženju smo svjesni u to da više nema dilema o tome da je stara devizna štednja imovina. Imovina koja je zaštićena Ustavom BiH, ali je isto tako štiti i Evropska konvencija za zaštitu ljudskih prava i osnovnih sloboda i njeni protokoli. Istrajaćemo na tome da se moraju krivično goniti svi koji su pokrali – opljačkali staru deviznu štednju i svi oni koji se na staroj deviznoj štednji i danas bogate, kao i svi oni čijim djelovanjem patnje vlasnika stare devizne štednje traju već osamanest godina.

Poštovana gospodo,

Sporazum o pitanjima sukcesije su 29. juna 2001. godine potpisali: Zlatko Lagumdžija u ime Bosne i Hercegovine, Tonino Picula u ime Republike Hrvatske, Ilinka Mitrova u ime Republike Makedonije, Dmitrij Rupel u ime Republike Slovenije i Goran Svilanović u ime Savezne Republike Jugoslavije, kao i Visoki predstavnik u BiH Wolfgang Petritsch.

Poštovana gospodo,

Veoma žalimo što u ovom pismu nismo u prilici da se koristimo diplomatskim vokabularom koji bi bio adekvatan komunikaciji sa predsjednicima vlada država članica Ujedinjenih naroda, Savjeta Evrope, a jedna je čak i član Evropske unije. Žalimo, jer nema diplomatskog rječnika za pljačku i lopovluk, za nepravdu i patnje vlasnika stare devizne štednje. Oprostite nam na neprimjerenim riječima, jer je i situacija u kojoj se nalazimo neprimjerena slobodi, pravdi i demokratiji koja bi trebala vladati u državama u kojima ste Vi na čelu izvršne vlasti.

Iako je Sporazum o pitanjima sukcesije potpisan od strane visoko pozicioniranih dužnosnika u državama nastalim raspadom SFRJ iako su se države potpisnice usaglasile da će sporazum implementirati u dobroj vjeri u duhu Povelje Ujedinjenih nacija i u skladu sa međunarodnim pravom (član 9. Sporazuma) Sporazum u suštini predstavlja jednu veliku prevaru, a član 9. Sporazuma je ostao samo prazno slovo na papiru, obična farsa. U stvarnosti su se prema Sporazumu o pitanju sukcesije države potpisnice odnosile uglavnom upravo suprotno. Borbene linije sa početka 90-tih su zamjenjene poglavljima Sporazuma i ogromna energija i najsposobniji kadrovi su se nažalost angažovali na iznalaženju efikasne opstrukcije, a implementacija se vršila isključivo na način koji bi nanosio ozbiljnu štetu nekoj od strana potpisnica.

Naravno da Sporazum o pitanjima sukcesije nije jedino "bojno polje" diplomatskog i manje diplomatskog nadoduravanja zemalja nastalih na području bivše SFRJ, ali je opstrukcija u primjeni Aneksa G Sporazuma, koji se odnosi na Privatnu svojinu i stečena prava imala dalekosežne negativne posljedice, posebno na vlasnike stare devizne štednje iz Bosne i Hercegovine.

Nismo sigurni da li se može dovoditi u vezu činjenica da je Sporazum u ime Bosne i Hercegovine imao duplu ovjeru u vidu potpisa Zlatka Lagumdžije i Visokog predstavnika Wolfganga Petritscha sa najmanje četvorostrukom štetnošću Sporazuma za vlasnike stare devizne štednje u Bosni i Hercegovini u odnosu na ostale štediše iz bivše države.

Do problema stare devizne štednje je došlo nezakonitim upadima u devizne rezerve bivše Socijalističke Federativne Republike Jugoslavije od strane država nastalih njenih raspadom. U slučaju Bosne i Hercegovine, neko je iz zgrade Centralne banke BiH, tadašnje Narodne banke BiH iznio vreće pune deviza. Neka istraživanja upućuju da su sredstva devizne štednje njenih građana vlasti u Bosni i Hercegovini koristile za nabavku oružja, municije i vojne opreme prije i u toku ratnih sukoba. Identično ili veoma slično je bilo i u drugim bivšim republikama. Sve što je uzeto, uzeto je ilegalno i u tajnosti, kako to čine najobičniji lopovi, bez bilo kakvih odluka, uredbi, zakona, ili bilo kakvih pisanih naredbi.

Stara devizna štednja u Bosni i Hercegovini je fizički bila teška oko 10 (deset) tona. Kako je bilo moguće iznijeti toliki teret, kada se mora evidentirati svako ko ulazi u trezor, jednako kao i svako unošenje ili iznošenje novca???

Ono što se štedilo u Ljubljanskoj banci se nalazilo u Narodnoj banci Slovenije, a ono što se štedilo u Investabanci se nalazilo u Narodnoj banci Srbije u Beogradu. Štednju u bankama koje su imale sjedište u Republici Hrvatskoj nećemo spominjati, jer je jedino ona korektno ispoštovala svoje obaveze i obeštetila vlasnike stare devizne štednje, bez obzira što su štedili na teritoriji Bosne i Hercegovine u filijalama ili ekspoziturama banka iz Hrvatske.

Kada su Vaši prethodnici kreirali Sporazum o pitanjima sukcesije objašnjavali su javnosti kako će se stare devizne štediše obeštetiti iz sredstava dobijenih privatizacijom državnog kapitala u privredi, državnog kapitala u stambenom fondu i poslovnim prostorima, dalje su spominjali sredstva koja će dospjeti na escrow račune po osnovu povlačenja depozita u međunarodnim bankama i finasijskim organizacijama, koncesije i slično.

Udruženje građana za povrat stare devizne štednje ima saznanja da je na escrow računu Centralne banke Bosne i Hercegovine bilo oko 400 miliona KM (konvertibilnih maraka) striktno namjenjenih za djelimično obeštećenje vlasnika stare devizne štednje. Ta sredstva su nestala sa računa, potrošena, a i pored višestrukih pokušaja i obraćanja Guverneru Centralne banke BiH i ministru finansija, nismo uspjeli u nastojanja da saznamo istinu i udemo u trag tom novcu. Obratili smo se Državnoj agenciji za istrage i zaštitu koja bi trebala utvrditi istinu.

Danas na vrata svih država svijeta kuca recesija i globalna finansijska kriza. Potencionalni izvori za namirenje vlasnika stare devizne štednje su uglavnom iscrpljeni i besomučno opljačkani privatizacijama koje su manje više u cijelom regionu obavljene na kriminalan način.

U proteklom haosu na Balkanu ubjedljivo najlošije su prošli vlasnici stare devizne štednje iz Bosne i Hercegovine. Republika Slovenija i Ljubljanska banka, odnosno njena sljednica NLB banka, niti Republika Srbija i Investbanka nisu uradile ama baš ništa po pitanju izmirenja svojih obaveza prema vlasnicima stare devizne štednje iz Bosne i Hercegovine. Vjerovatno da u istoriji civilizovanog čovječanstva nije zabilježena veća pljačka niti pak više drski pljačkaši, koji niti se kajaju niti su spremni preduzeti bilo šta što bi umanjilo patnje i bol opljačkanih.

Međunarodna zajednica kao oblik djelovanja tog civilizovanog čovječanstva je pokrenula ratne mornarice kako bi spriječili pljačke gusara u Adenskom zalivu. Pljačka starih deviznih štediša na Balkanu nikoga nije uzbudila i izgleda ni neće, mada su u pitanju sredstva koja višestruko premašuju vrijednost brodova i tereta koji bi u jednoj godini prošli rizičnim morskim putem.

Možda se nije ni čuditi ponašanju Republike Slovenije i Republike Srbije za ponašanje prema opljačkanim štedišama iz Bosne i Hercegovine, kada se i same vlasti u Bosni i Hercegovini prema svojim građanima ponašale na način koji kao da je bio inspiracija bankama i vlastima u Sloveniji i Srbiji.

Bosna i Hercegovina je donijela zakon kojim uređuje oblast stare devizne štednje. To nije zakon, to je prevara. Zakonom nije urađeno ništa u korist vlasnika stare devizne štednje, nego je naprotiv, stvoren pravni okvir za dalje bogaćenje i nastavak pljačke. U tu svrhu je izmišljena "verifikacija" kao najobičija farsa u vidu konverzije deviza u domaću valutu i odricanja od tužbe. Pristup računima stare devizne štednje nije dozvoljen vlasnicima te štednje, jer su malverzacije nepojmljivih razmjera. Stara devizna štednja je ponovo pljačkana tako da su vršena isknjižavanja sa računa štediša bez njihovih naloga u korist tajkuna, a u svrhu privatizacije. U svrhu pljačke su formirane specijalne agencije takozvani APIF-ovi koje su leglo kriminala svih vrsta. Svega 7% stare devizne štednje je verifikovano, a situacija je identična i za one koji su verifikovali i one koji nisu. Novac nisu dobili ni jedni ni drugi, samo što su oni koji su verifikovali dali priliku da budu po treći put opljačkani kroz trgovinu obveznicama stare devizne štednje na berzama.

APIF-ovi su čak u sprezi sa korumpiranim sudijama preuzeli i pravosudne funkcije, pa su za preko 4000 podnosilaca tužbe pozivajući ih da verifikuju svoju štednju, izdali upozorenje da će se u protivnom smatrati da odustaju od tužbenog zahtjeva.

Moramo ukazati i na bruku planetarnih razmjera koju su napravili ili još prave sudovi u državama u kojima ste vi predsjednici vlada. Vjerovatno će generacije i generacije istraživača proučavati najsofisticiranije oblike izigravanja člana 6. Evropske konvencije o zaštiti ljudskih prava (pravo na pošteno suđenje). Sramota i

ljaga koju su takvim postupanjem nanijeli pravnoj struci neće izbljediti godinama i kao negativni primjeri biće upisani u anale neljudskog i diskriminatorskog ponašanja.

Poštovana gospodo,

Zbog svega navedenoga mi iz Udruženja građana za povrat stare devizne štednje u BiH i dijaspori obavještavamo Vas da očekujemo od Vas i Vlada Bosne i Hercegovine, Republike Slovenije i Republike Srbije da do kraja marta 2009. godine okončate sukcesiju i jasno se odredite po pitanju stare devizne štednje. U zavisnosti od toga će ovo Udruženje kreirati pravce svoga djelovanja. Pošteno govoreći među članovima Udruženja postoji visok nivo konsenzusa oko toga da je sasvim moralno opravdano da vlasnici stare devizne štednje krenu sa namirenjem iz sredstava banka (ili pravnih sljednika tih banaka) u kojima su štedjeli ili finansijskih interesa država koje su odgovorne što je njihova bol i patnja postala punoljetna.

Ako želite kompromis i ako imate poštene namjere Udruženje je spremno da prihvati učešće u iznalaženju rješenja koje može biti korektno i obostrano prihvatljivo.

Iako smo u očajanju i depresiji, mi vlasnici stare devizne štednje smo dostojanstveni i poštteni, i poručujemo da nećemo do vijeka trpiti nepravdu. Na mirnim protestima smo 28.12.2007. godine skrenuli pažnju moćnicima da rješavaju naše probleme i da nam vrate našu imovinu i naše ljudsko pravo. Naši mirni protesti su brutalno razbijeni, a desetine starih, bolesnih i obespravljenih je premlaćeno od strane elitnih jedinica policije. Slike sa tih protesta dostavljamo. Imajte na umu da su oni za nas naučena lekcija.

S poštovanjem,

Za Upravni odbor
PREDSJEDNIK
Svetozar Nišić



Dostavljeno:

1. Tary Daviss Generalni sekretar Savjeta Evrope;
2. Tomas Hamerberger, Komesar za ljudska prava pri Savjetu Evrope
3. Jan-Paul Costa, predsjednik Evropskog suda za ljudska prava
4. Parlamentarnoj skupštini BiH;
5. Vladi Federacije BiH i Vladi RS;
6. OHR-u
7. Ombudsmanu BiH i
8. Medijima